

In PáadÉ'IN Ta'nin Paul-di In Thessalonica Búu'úwi Méesate'in T'owa ovâyta'nannin

1 Na'in Paul-á Silas-á hedá Timothy-á gimuu'indi un méesate'in t'owa oe Thessalonica búu'ú íthaa'in wâyta'do', undá Yôesi na'inbí Tádáví'in hedá Na'inbí Sedó Jesus Christ-ví'indá ímuu. Yôesiví séegísehkanä bîn má've-í, hedí idi wovâykhage'namí anshaaginpidíbo' íkwó'nídí.

Háa Yôesiví t'owa oe Thessalonica búu'ú dithaa'in dívíwhâyunde waa hedá háa inbí wówátsi dâyhon waa

2 Hãädi waa ívívúusu'o' ihaydi Yôesi Tádá áykú'daa'o' un ímuudi,

3 hedí Yôesi na'inbí Tádáví'piye' ívívú'indedi ívívúusu'amídí hãädi wänbo t'ähkí ívív'ánshaa'o' háa úvív'o'in Jesus-ví'piye' úvívwhâyundedi, hedá háa báyéki úvít'ôemáa'indá Jesus bín séegídí, hedá háa úvívää'o'indá Na'inbí Sedó Jesus Christ nawáy'ää-ídí úvívíksíkhá'máadi.

4 Tí'úuwín páadé'in, un Yôesi Tádádí wovây séegí'in, gínhanginná idi wovâyde'mannin iví'in ímúnídí.

5 Yôesi Tádáví híwó'di tų na'indi wây mági'i tųdą' wínamuupí, hewänbo hääwí kay'i namuu, hedí wây t'ôe'odi i Yä'dâa'i P'oewaahâa na'indádí nayí, hedí gínhanginná nă'i tų-á ta'gen namuu'in.

Undá únhanginná háawin wówátsi âyhonnin undáđi giyi' ihayđi, hedi t'ähki íví'andi-á ungi'da' namuu.

⁶ Hedi ihayđi úvísó'dêe na'in waagi'inbá hedá Na'inbí Sedó Jesus waagi'ba-á ímúnídí, hedi tobáháa báyéki t'ôephade únpówa wänbo', i Yä'dâa'i P'oewâhâadi hihchan wovâymägi na'inbí tuu dînhógi ihayđi.

⁷ Hediho t'ähki in wé'ge'in Jesus-ví'piye' dívíwhâyunde'in oe Macedonia nange hedá Greece nangá dikw'ó'nin undá bînkeeyan háawin wówátsi in dínkhây'ä' dâyhûuwí'in.

⁸ I tuu Na'inbí Sedó Jesus-ví'gedi thay'eedi unbi'wedi napeedi oe Macedonia-piye' hedá Greece-piyá nawadedee, hewänbo iwepiyeda'ba yoe, wéngé t'ähki t'owa ho dit'oe háa Yôesiví'piye' úvíwhâyunde'in, hediho wínatáypí wiyá háawên unbi whâyü i'gedi âytu'âamídí.

⁹ Hä'in t'owabo unbi'gedi ditü' háa undi na'in díséegi'annin, hedá háa hääwí bínkhíyédí unbi yôesi waa bínchâa'i bînyoe'annin Yôesiví'piye' úvíwhâyü-ídí, hedá háa nää-á i kodí'di Yôesi bîn'a'ginmä'in, i-á i ta'gendi nawówayi'i namuu,

¹⁰ hedá wá' dit'oe háa nää iví ay ûnmuu'i bîntsíkha'máa makówáđi nawáy'ää-ídí, i-á Jesus namuu, i Yôesi Tádáđí óewáywówâpaa'i', hedi idibá dîn'aywonkhâyamáa owáy ihay thaa Yôesi Tádáđí t'owa ovâyutuchänu iwe, inbí t'aywó'di dínmuudi nat'aydi.

2

Háa Paul oe Thessalonica búu'ú Yôesigî' it'ôe'an waa

1 Tí'ûuwín páadé'in, únhanginná unbí'we giyi' ihaydi háa íví'an waa wínapedeepí.

2 Undá únhanginná unbí'we gipówápídíbo báyéki dí't'ôephadekannannin hedá báyéki híwó'pí' na'in díhéé'annindá oe Philippi búu'ú. Hewänbo tobáháa báyéki t'owadi dí'ahkhâa'amí'in dida' wänbo na'inbí Yôesidi khuwôeda' dînyâa'an iví híwó'di tuu wâytu'âamídí.

3 Na'indi wâywhäyu'amídí ívísó'dinde' ihaydi, in ta'gen namuu iwedi wí'ívíhânge'anpí, hedá na'inbí ánskaa-á yä'dâapí' wíginmuupí, hedi hääwí wänbo unbí'wedi wí'âykaayanpí.

4 Yôesi Tádádí na'in dítayí', hedá dímu' ihay híwó'nin gimuu'in iví híwó'di tuu âyt'ôe'amídí. Hedího ívíhí'máadi wí'ívísó'dindepí t'owa âywänpihíhchannamídí, hewänbo Yôesi Tádá-ân âyhíhchannamídân. I-áho hääwí t'ähki na'inbí pí'nä khó'yé âymáa'i' imunde'.

5 Un únhanginná sa'wó'gí unbí'gedi wí'ívíwänpihéé'anpí, hedá wá' wí'ívíhîeyó'anpí undi hääwí dímäänídí. Yôesi Tádá ûnhanginná ná'indá in ta'gen namuu'in.

6 Hedá undádí giyi' ihaydá wí'ívísó'dindepí t'owa na'inbí'gedi híwó' dívíhéé'amídí, un wänbo-á háa wây-á to'wên wänbo-á yoe, tobáháa Christ-ví t'ôekhuwa'in gimuuđi gínk'óe wänbo he'ennin dípaa-ídí.

7 Hewänbo na'in undádí giyi' ihaydi, wí yiyá iví áyyää itsää'odi ovây'âyínmáa waagibá wâysehkaná'an.

8 Na'indi báyéki wâyda', hedi na'inbí séegi unbí'piye' gínmuudânkun gikhâymuu Yôesi Tádáví

híwó'di t̃u w̃aymääníđíđá'bã yoe, hewänbo na'ínbí wówátsi wá'.

9 Tí'úuwín páadé'in, ti wí'ún'ánshaapí'an, undáđi gikw'ó' dihayđi báyéki ívít'ôe'an. Yôesi Tádávi híwó'di t̃u w̃ayt̃uuphadende' ihayđibá khuu-á thaa-á ívít'ôe'an wá' âychä't'aaníđi, hedânho un wí'bo wí'úntâyínípi hääwí gíntáy'i dímääníđi.

10 Un Christ-ví'piye' úvíwhäyunde'indáđi na'in gikw'ó' dihayđi, háa na'ínbí wówátsi âyhon waagi yä'dâa'indá ta'ge'indá gínmuu, hedá to'wí wänbo-á wí'únkoedípi wên háawên wänbo na'ínbí'piye' dînt'e'p'íde-íđi. Un únhanginná hedá Yôesi Tádá wá' únhanginná ná'in in ta'gen namuu'in.

11-12 Hedá wá' un únhanginná wí'inbo wâyhéé'annin, hedi na'indi wâytumakhe'an wí tádá iví áyyäâ ihée'o waagibá, hedá wâykweewaasenwaatu'an, hedá kaygi'díđá wâyhéé'an unbí wówátsi híwó' bînhûuwíđi hedânho Yôesi Tádá nahíhchaa-íđi. Idânho wówâytukánnan iví'piye' í'äâ-íđi makówápiye' ímu-íđi hedá iwá he'ennin ípúwíđi.

13 Hedi wíyá hääwí namuudi wá' Yôesi Tádá hääđi wänbo t'ähki âykú'daa'o'. Ná'i t̃u w̃ayt̃umáa'i' un ít'oedi hedá bînséegí'andá Yôesiví'wedi na'ää'in úvíwhäyu, t'owaví'wedíđá'bã yoe. Hedi ta'gendi Yôesiví t̃u-ân únmuu, hedi ná'i t̃ubá un ipiye' úvíwhäyunde'ínbí pí'ná kó'yé ít'ôemáa.

14 Tí'úuwín páadé'in, háa in Judea nangewin méesate'in t'owa Yôesi Tádá óe'a'ginmä'in hedá Christ Jesus-ví'piyá dívíwhäyunde'in dínpoé waagibá un hanbá únpoé. Unbí ówînge'in t'owadibo

wovâyt'ôephadekannan in Hudíyodi inbí t'owa oe Judea ovâyt'ôephadekannan waagibá.

15 In Hudíyodânkun hân'oe Yôesi Tádávi tukhe?min ovâyhánú, hedá indibá Na?inbí Sedó Jesus óehay, hedá na?indá wá? díkhehpiye. Indidá Yôesi Tádá háy wânbo wí'óehíhchandopí, hedá to?wên t'âhki dâyyoegi'o?.

16 Dívisó'dêe dí'ahkhâa-ídí in Hudíyo dimuupí'in t'owa hádídí ovây'aywoeni'in wí'âyt'ôe'âamípídí, hedi handídi ná?in Hudíyoví t'aywó'di dínsômän, hediho Yôesi Tádá inbí'piye? nat'aydi nää inbí tuchänu ho dínpówá.

Paul hânho nada? in Thessalonica-win méesate'in t'owa ovâymuní'in

17-18 Tí'ûuwin páadé'in, unbí?wedi wí háy tähki giwiyedee, hewänbo tobá undádí wígw'ôhpi wânbo wa?di na?inbí pí'ná khó'yé unbí?gedi wây'ánshaamáa, hediho hânho wiyá wâymuní'in gida?, hedi unbí'piye? gimú-ídí ívisó'dinde?. Naa Paul háyänbo dáysó'dêe wâymunídí, hewänbo i Penísendídi dí'ahkhánde?.

19 Owáy Na?inbí Sedó Jesus nawáy'äãdi iví páadépiye? giwin dihaydi, gitsíkha unnân iwebá wâymunídí, hedá un ímuudá gihíhchangít'óe, hedá unbí?gedá íviyêngihée'amí, wí häãwí git'anpóe'i? ímuu waagibá.

20 Un ímuudânkun na?in hânho híwó? gichanpo? hedá ívíhíhchando?.

3

1-3 Na?in hânho gihangin?ânda? háa un únpo?in, hedi báyéki gitaachanpóedí wígw'íkhakanda?pí

gínhanginpúwí'in, hedânho gi'ân shánkí híwó' namúní kinnân íví'amí'in: Naa oe Athens o'ân dihaydi iwebo dáywóyí', hedi iwedi na'inbí tí'ûu páadé'i Timothy unbí'piye' âysan, i-á na'indádí it'ôe'o' t'owa ovâyt'ôe'amídí Yôesi Tádáví híwó'di tuu Christ-ví'gedí. Hediho unbí'piye' i wâysan wovâykweewaasenwaatu'â'amídí hedá wovâykhäge'namídí shánkí kay'indi Christ-ví'piye' úvíwhäyú-ídí, hedânho i t'ôephade únpóe'i' namuudi wí'úvíyâa'amípídí unbí whäyü iwedi. Unbo únpihanginná Yôesi Tádádí ná'i t'ôephade dînpúuwí'in imä'.

⁴ Wa'di undádí giyi' ihaydibo wa' napóepídíbo' ihayda' wâytu'o' âyt'ôephadegít'ôe'in, hedi únhanginná hanho napóe'in.

Timothy-di Paul óetu'an in Thessalonica-win méesate'in t'owa híwó' dimännin

⁵ Hedânkun báyéki otaachanpóedí wí'díntsíkhakoedipí Timothy unbí'piye' dósaanídí. Naa hânho ohangin'ânda' unbí whäyü i'gedí háa kay'in únmuu'in háa yoe. Áyíngi iwe o'ânwân gá o'ândân hádíwáy i Penísendídi wovây'tannin, hedi wovây'tandá hääwí t'ähki ungi' íví'andi pedee'in gínpúwí.

⁶ Hewänbo nää-á Timothy na'inbí'we nawáypówá, hedi wí híwó'di tuu úvíkanhon ní'gedí dínkán. Idi dítu'an unbí whäyü wa'di únkay'in hedá séegi-á bînmáa'in, hedá häädi wänbo t'ähki na'inbí'gedí híwó'da' úví'ánshaamáa'in, hedá ta'gendá ída'in wíyá díwáymúní'in, na'indi wâymuní'in gida' waagibá.

7 Hedânho tí'ûuwin páadé'in, wa'di híwó'bo úvíwhäyunde'in gínhanginpóe ihaydi báyéki gihíhchanpóe, tobáháa báyéki kâyi t'ôephade iwe gikw'ôn wänbo'.

8 Nää gínhanginná unbí whäyü Na'inbí Sedó Jesus-ví'piye' kay'in únmuu'in, hedího hânho sa'wó' na'inbí wówátsi âyhon.

9 Na'indi Yôesiví'piye' wâyyûusu'odi hânho gihíhchanpo', hedího un ímuudi tobáháa háyü Yôesi Tádá âykú'daa'o wänbo', ihay kú'daa wänbo wa' wí'ây'ohpí.

10 Khuu-á thaa-á pín ta'ge haydi Yôesi Tádáví'piye' ívíyûusu'o' idi dípunmäänídi unbí'piye', hedânho wíyá wâyhá'amídi, hedí handídi wíyá háäwí úntáy'i' íhâhpúwí shánki híwó' úvíwhäyü-ídi.

11 Yôesi na'inbí Tádá hedá Jesus na'inbí tsondi hay'i-á âyda'máa unbí'piye' díhûuwídi.

12 Gida'po' Na'inbí Sedó Jesus-di wovâykhäge'namídi hedânho shánki wänbo wí'nä táye úvíséegíhûuwí, hedá wé'ge'in t'owa-á wá' hanbá bînséegíhûuwí.

13 Handidânho Na'inbí Sedó Jesus-di unbí pí'nä khó'yé shánki wovâykaymääní, hedího owáy i nawáypówa ihaydi t'âhkí in wé'ge'in t'owa iví'in únmuu'in wóegé, undá yä'dâa'inbo Yôesi Tádáví páadépiye' úvínú-í, hedá wên háawin wên wänbo wovây't'e'p'íde-í'in wívîn má've-ípí unbí pí'nä khó'yé.

4

Gínkhây'ä' híwó' na'inbí wówátsi âyhûuwí'in Yôesi

âyhîhchannamídí

1 Tí'ûuwin páadé'in, nää ná'i wâytu'âamí: Háa unbí wówátsi bînhûuwí'in Yôesi Tádá bînhîhchannamídí wâyhá'anho', hewänbo Na'inbí Sedó Jesus-di dînk'û' wâydaa'amídí hedá wâytumakhe'amídí shánkí wänbo úvísó'dêe-í'in kin úv'âamídí.

2 I tsonṭu wâytu'andi' un úhanginnânho', hedi ná'i tsonṭu-á Na'inbí Sedó Jesus-ví'wedân na'âä.

3 Kinnân Yôesi Tádá nada' úvíkanhûuwí'in: Yä'dâa'indá' unbí wówátsi bînhûuwí, hediho to'wí unbí sedó háa kwiyo wí'únmuupí'-áđí wí'úvíwhqkwomá've-ípí.

4-5 Yôesi Tádá nada' unhanginnání'in háa unbí túu'ú bîntsonmá've-í'in, hedânho yä'dâa'in ímúní hedá t'owadá wovây'a'geení, hedi unbí túu'úđí háa íwänpichaa waagida' wí'úv'âamípí, hedânho in wé'ge'in t'owa Yôesi Tádá dâytaapí'in dívíkanhon waagi wí'úv'âamípí.

6 To'wí wänbo wí'únkhây'âhpí wíyá to'wí Jesus-ví'piye' iwhâyunde'i híwó'pí óemá've-í'in háa iví kwee háa sen óekwee-í'in. Thay'eedi hedá kay'indá ho wâytu'an, Na'inbí Sedó Yôesidi in to'wên han díví'o'indá ovâyutuchänukhâymaa.

7 Yôesi Tádáđí na'in dítukánnan iví'in gimúníđí hedânho yä'dâa'indá' gipúwíđí, tsé waagi'inbá giyêenidá yoe.

8 Hediho to'wên ná'i híwó'di háhkan dâyyoegimáadáho wí hí' t'owaví'da' wí'ovâyyoegi'opí, hewänbo Yôesi Tádáví hí'-ân ônyoegi'o'. Yôesi Tádáđânho iví P'oewaahâa dímägi, hedi ná'i P'oewaahâa-á yä'dâa'i namuu.

9 Wínatáypí naadi wáyta?namí?in háa únkhây?ä? in wé?ge?in Jesus-ví?piye? dívíwhâyunde?in bînséegihûuwí?in. Yôesi Tádádí ho wovâyhá?an kin úvíkanhûuwí?in.

10 Hedí ta?gendi undi t'ähkí in Jesus-ví?piye? dívíwhâyunde?in háä Macedonia nange dikw'ó?nin bînséegí, hewänbo kaygi?di wáytumáa wíyá shánkí wänbo bînséegihûuwí.

11 Úvísó?dí?be-í unbí wówátsi hanginpi híwó? bînhûuwídí, hedá ún?áyîngiwó?náhpí i?ge wí?úvítomá?ve-ípi, hedá unbí wówátsi únmuu?igí? úvít'ôe?âamí bînpichä?t'aanídí, háa na?indi wáytu?an waagibá.

12 Kin úvíkanhondi t'owaví khäge? wí?úntâyínípi, hedá háa unbí wówátsi bînhon waagidi t'owa Yôesiví?piye? dívíwhâyunde?in dimuu?indá wovây?a?ginhûuwí.

Háa napuwagít'ôe?in Jesus nawáy?ä? ihaydi

13 Tí?úuwín páadé?in, gida? un únhanginnání?in háa in to?wên inbí wówátsi dâybowa?in dínpuwagít'ôe?in. Wáy wên t'owa-á i?gedi wídínhanginnáhpí, hedânkun to?wí nachuu ihaydi dik'áykháapo?. Naa wó?da?pi íchanpúwí?in háa in dichaa waagibá.

14 Ívíwhâyunde Jesus nachuu?in hedá nawáywówápóe?indá, hedânkun kin wá? ívíwhâyunde?: To?wên Jesus-ví?piye? dívíwhâyunde?in inbí wówátsi dâybowa wänbo?, Yôesi Tádádí ovâywáywówápaa-í Jesus-ádi dikwó?nídí owáy nawáy?ä? ihaydi.

15 Ná?in wáytukankhâymaa?in Na?inbí Sedó Jesus-ví hí? únmuu: I nawáy?ä? ihaydi in to?wên

inbí wówátsi dâybowa?inbí páadébo na?in wa?di giwówáyi?in iví?piye? wíginmánpí.

16 Kinnân napúwí: T'owa dit'óe-í wên tsontuú kaygi nakeetú?nin waagi?inbá, hedá i p'ó?dédí? makówáwi t'ôepa?aa?ivi tuu waagibá-á, hedá Yôesi Tádávi tenphé waagibá-á. Ihaydáhá? Na?inbí Sedó Jesus-á makówádá nawhání. Ihaydibá in to?wên dihánnin Jesus-ví?piye? dívíwhâyü?indá diwáywówápúwí,

17 hedáhá? na?in wa?di giwówáyi?indá wé?ge in dihánnindádí oe okhúwá nakw'ó? diwepiye? dípiyegít'óe, hedí iwe Na?inbí Sedó Jesus áyyáy-í, hedího i-ádí hãnhay wãnbo t'ãhkí gikwo?ní.

18 Hedího únkhây?ã? ná?i hãäwí i?gedí wí?ná táye úvíhí?má?ve-í?in hedãnho wí?ík'áykháa-ípídí.

5

Gínkhây?ã? gikhâymuní?in Jesus nawáy?ãã-ídi

1 Tí?úuwin páadé?in, hãädi háa wé?i thaa Jesus nawáy?ã? i?gedí wâyta?namí?in wínatáypi.

2 Unbo ta?gendi únpihanginná Na?inbí Sedó Jesus nawáy?ã?in, hewãnbo wínahanginnáhpí hãädi i thaa nanání?in. Wí sãnbi tsíkhagipí khu?dédí na?ãã waagibá, Jesus wá? tsíkhagipí napowagít'óe.

3 T'owa ditú?be-í, “Hãäwí t'ãhkí áyîngipídíbo híwó? gínmã, hedího há?to hãäwí wãnbo híwó?pí? gínpúwí.” Hewãnbo wa?di ha?wãa dívíhí?mãädíbo t'ôephade dínpuwí, hedí há?to iwedi bahpíbo dipée-í. Tsíkhagipí ná?i dínpuwagít'óe, wí kwee nats'an?eyehaypo? waagibá.

4 Hewãnbo tí?úuwin páadé?in, undá wên t'owa khuü ee dithaa?in waagi?in wí?ímuupí, undá

híwó? únkeet'óe, hediho Jesus nawáy'ä'i thaadi áyîngipídíbo wíwovâyhónípí, wí sänbidi wovâyhóní waagibá.

⁵ Undá t'owa hääwí t'ähkí thaadida? úví'o'in hedá nakohthayná? ni'ge ímännin waagi'inbá ímuu, in t'owa hääwí t'ähkí khuudi nakohkeet'óepí ee díví'o'in waagi'inbá wígimuupí.

⁶ Hedânho wígínkhây'ähpí t'owa yó'in dimuu'in waagi'inbá gimúní'in, hewänbo giyósa'wo waagi gikwo'ní, hedá na'inbí tsiyekandá híwó'dá äy'áyîngihûuwí.

⁷ Khu'déedân t'owa diyókháyä? hedá dívísuwäyíyénde?

⁸ Hewänbo na'in thaadi'in gimuu, hediho na'inbí tsiyekan gínkhây'ä? äy'áyîngi'âamí'in. Yôesivípiye? ívíwhâyü-í hedá t'owa-á äyséegihûuwí, hedi kin íví'odá wên sundado dikhâywinnin waagi'inbá gimúní, inbí pîkhú iwe'i kwäk'u aa dívípitógidi inbí túu'ú dâý'áyîngi'âamídí. Hedá pín ta'gedí gitsíkha-í Yôesidi dîn'aywoenídí, hedi handidá in sundado inbí kwäk'u p'ôhkhändá inbí p'ôn dâý'áyîngi'o'in waagi'inbá gimúní.

⁹ Na'inbí Sedó Jesus na'ingí? i'annin namuudi Yôesi Táđádí díde'man dîn'aywoenídí, t'aydi dítuchänú-ídá yoe.

¹⁰ Jesus na'ingí? nachuu, hedi owáy nawáy'ää ihaydi tobáháa na'inbí wówátsi äybowa wänbo háa wa? giwówayi wänbo? hñhaya wänbo t'ähkí i-ádi gikwo'ní.

¹¹ Hediho wí'nä táye úvíkay'âamí hedá úvíkweeaaßenwaatu'âamí, háa nää úvíkanhon waagibá.

Báyékí hääwí i'gedi ovâytumakhe'an

12 Tí'ûuwin páadé'in, nã'in na'indi wâyda'máa: Bîn'a'ginnamí in to'wên unbi'ge diyí'in Na'inbí Sedó Yôesidi ovâykw'ódi'in wovâypahûuwídí hedá wovâyhá'amídí. Indá kin dâý'amídí báyékí dívít'ôemáa.

13 Hedího nã'i hääwí wovây'o'i namuudi báyékí bîn'a'ginhûuwí hedá bînséegihûuwí. Hedí t'ähkídíbo tsaaginpidíbo wé'ge íthaa-í.

14 Tí'ûuwin páadé'in, nã'in tumakhe wá' wâymãáni: In dit'ôeda'pí'in bîntu'âami ha'min wídimúní. In dikhuwôeda'in dimuu'in ovâykhäge'namí wídkhuwôeda'-ípídí. In kay'indi dívíwínúndepí'indá wá' ovâykhäge'namí. T'ähkí t'owa-ádi úvíbo'atã'amí.

15 Wí to'wídí wíyá to'wí híwó'pí óe'andáho', wíwînkamãání. In wí'di híwó'pí. In ónwáybuúnídí, hewänbo undá únkhy'ä' häädi wänbo t'ähkí úvísó'dêe-í'in wí'nã táye híwó'dã' úvíkanhûuwídí, hedá wé'ge'in t'owa t'ähká wá' hanbá bînhûuwí.

16 Häädi wänbo t'ähkí íhíhchaa-í.

17 Häädi wänbo t'ähkí íkhâymúni úvíyûusu'amídí.

18 Íkú'daapúwí tobáháa háa napóe wänbo'. Kinnânkun Yôesi Tádá nada' úví'âami'in, gá Christ Jesus-ví'in ímuudân.

19 I Yä'dâa'i P'oewaahâavi t'ôe wíwîn'ahkhâa-ípí.

20 Yôesi Tádáví tukhe'min dimuu'inbí hí' hääwí dínchã'muupí waagibá wíwînchanhûuwípí.

21 Hewänbo hääwí t'ähkí híwó' bîntayí'ní, hedá i híwó'di namuu'idã' bînkxonhûuwí.

22 T'ähkí yä'dâapí' namuu iwedi úvíyâa'amí, tobáháa hääwí namúni wänbo'.

23 Yôesi Tádádí díkhäge?do? áns Haaginpídíbo gikwo?nídí, hedi idânho wovâykhäge?namí wá? yä?dâa?inda? ímúnídí, hedi idá unbí wówátsi thaa t'ähkí wovây?áyíngi?ámí, unbí p'oewaahâa-á unbí hâa-á hedá unbí túu?ú-á, hedânho owáy Na?inbí Sedó Jesus Christ nawáy?ä? ihaydi häwíwídi wänbo wíwovâyt'e?p'íde-ípídí.

24 Hedi Yôesi Tádádí ta?gendi wovây?áyíngikhâymáa. Idá wovâytukánnan iví?in ímúnídí, hedi háa natû? waa ta?gendi i?o?.

25 Tí?úuwin páadé?in, dínyúusu?âámí.

26 T'ähkí in wé?ge?in méesate?in tí?úuwin páadé?in iwe dikw'ó?nin bínséegísengitu?âámí.

27 Naadi wâytsonmáa, ná?in ta?nin t'ähkí in wé?ge?in méesate?in tí?úuwin páadé?in dit'óe-ídi bîntu?ámí, gá Na?inbí Sedó Jesus kin nada?dân.

28 Na?inbí Sedó Jesus Christ-di iví séegísehkanä wovâymäáni.

Naʼinbí Sedó Yôesiví Tʷʷ / Nanbí Sedó Jôesiví Tun

New Testament in Tewa (USA) (San Juan/Santa Clara)

copyright © 2012 Wycliffe Bible Translators, Inc.

Language: Tewa

Translation by: Wycliffe Bible Translators

Contributor: Wycliffe Bible Translators, Inc.

Naʼinbí Sedó Yôesiví Tʷʷ (San Juan)/ Nanbí Sedó Jôesiví Tun (Santa Clara)

Copyright Information

© 2012, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tewa (USA)

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files dated 29 Jan 2022

f775bf1b-8c8a-5c5e-9288-3b9b00387997